

卷之三

華陽集卷第十

金壇後學于孔蕪校

表

奉上皇太后冊寶賀表

臣某言臣恭聞十二月十二日奉上皇太后冊寶者詔奉慈闈肇正母儀之位禮嚴寶冊聿彰聖孝之隆臣某誠歡誠忭頓首頓首竊以聖人之德無大於事親天下之尊莫先于顯號欽惟母后體順坤元立子生商上協有娥之瑞維莘纘女遠同太妣之賢輔佐先朝儀刑內壺眷大明之保佑宜長樂之推崇恭

惟皇帝陛下明德懋昭孝誠克薦暫阻慈顏之奉
靡遑宸慮之安爰舉舊章式隆徽稱因親教愛眇四
海以深仁率土均歡尚一人之有慶臣叨官邇列竊
食外祠北面稱觴顧走趨之莫預東朝視膳指日暮
以爲期臣無任

磨勘轉左朝散大夫謝表

臣某言今月十八日伏奉告命以臣磨勘蒙聖恩授
左朝散大夫依前充徽猷閣待制特封金壇縣開國
男食邑三百戶差遣賜如故臣已於當日望闕謝恩
祇受訖計日爲勞方慙功今進官以叙忽奉贊書撫

躬何以堪任拜命莫知所措臣某誠惶誠懼頓首頓
首伏念臣學非博古智昧趣時早玷明揚犬馬未伸
於報効中遭難禍桑榆已迫于衰殘誤被聖知尚聯
法從旣竊祠庭之祿復安里社之私毫髮無功敢累
陟明之典絲綸假寵遂偕增秩之科併錫戶封肇開
爵邑顧便蕃之下逮豈綿薄之能勝茲益伏遇皇
帝陛下任賢使能立政造事欲熙庶績遠稽三考之
文式謹銓曹大計羣吏之治苟未罹於罪咎咸獲被
於褒陞有若孱庸獨多僥倖隆天重地固莫喻于洪
恩殞首捐軀誓不移于素節臣無任

紹興十二年再任宮觀謝表

臣某言臣昨爲宮觀任滿陳乞再任續奉勅命候今任滿日令再任臣已卽時望闕謝恩祇受訖奉祠滿歲每懷尸素之慚錫寵自天再遂安閒之請官不易舊得之若驚臣某誠惶誠懼頓首頓首伏念臣頃以瑣材謬陪法從勞能弗著罪戾彌深投閑已出于寬恩式序更躋於邇列中遭家禍誰憐陟岵之悲甫畢喪期首拜循墻之命旣參華於內閣復叨祿於殊庭藏拙甚宜計功何有坐移歲籥時遽迫於終更仰叩宸旒志欲仍於舊貫敢圖洪造亟下俞音當桑榆遲

暮之年荷天地隆寬之德矜其樗散賜以龍光揆厥所蒙其何以稱茲益伏遇 皇帝陛下勵精庶政允釐百工道本曲成各隨材而因任仁由博愛咸稱物以無私故於下愚特從所欲臣敢不恪遵義訓謹佩忠規羞神武之衣冠顧餘生未能報國夢長安之鍾鼓雖一息不敢忘君指心誓天捐軀有日臣無任
懿節皇后上僊慰表

臣某言臣今月一日恭聞 大行皇后奄弃宮闈伏讀詔音殞越失次臣某誠悲誠感頓首頓首伏以 大行皇后淑德懿行居順履中早正六宮佇徽音之

華陽集 卷之十
內肅方迎重翟俄訃問之北來遠暨寰區同深孺慕
恭惟 皇帝陛下禮先宗事望隔坤儀願少抑於皇
情庶克安於邦計臣伏限職任在外不獲躬詣闕庭
臣無任

皇太后還闕賀表

臣某言臣恭聞 皇帝備法駕至臨平奉迎 皇太
后還宮者馳使節以交鄰爰示一人之孝奉慈闈而
返國式均萬寓之歡光照冊書福及宗社臣某誠歡
誠忭頓首頓首竊以崇高莫大於富貴愛欽必盡于
尊親故周武薦生實本維莘之慶而漢文踐祚乃先

薄后之迎禮雖備于前聞事莫難于今日恭惟 皇
帝陛下堯仁天覆舜孝日隆瞻望母儀極德音之遠
想焦勞聖慮思順事以解憂精誠既格於窮旻盟好
果通于殊壤風雲萬里宇宙一心共寬陟屺之思亟
迓安輿之至駐臨平之法駕旣展上儀奉長樂之慈
頽卽安大養盛德之事曠古所無臣竊祿祠庭叨官
禁路東朝問膳想聞環珮之聲北面稱觴阻造鴛鸞
之列臣無任

紹興十三年冊立皇后賀表

臣某言伏覩制書恭聞冊立皇后禮成者天作之合

禮既備于宮闈王假有家化已行于寰宇一人襲慶
萬世蒙休臣某誠歡誠忭頓首頓首臣聞治道所先
人倫爲大周南歸美于后德王化始基義易正位于
家人天下自定坐致本支之茂適觀風俗之醇恭惟
皇帝陛下性體堯仁躬行舜孝念祖宗繼嗣之重稽
天地合德之宜奉承長樂之訓言聿嚴壺制參考永
平之故事爰舉徽章告虔昭格於璇穹錫命寵臨于
寶冊在禮爲稱于古有光臣叨備從班獲聞盛典彤
史之修內治方率職於坤儀封人之祝多男佇迎祥
於震索臣無任

紹興十三年郊祀禮成賀表

臣某言臣恭聞今月八日郊祀禮成大赦天下者秩
彌文而饗帝既藏上儀歛諸福以錫民亟敷大號時
方日至喜若春回臣某誠歡誠忭頓首頓首臣聞萬
物皆本于天繼天者必嚴於父事五經莫重于祭主
祭者尤謹于親郊允屬熙朝恪遵鉅典恭惟 皇帝
陛下聖由天縱德以日新孝悌通于神明永奉東朝
之養忠信行乎蠻貊坐寬北顧之憂時和歲豐而百
谷順成兵寢刑措而四民休息不顯中興之效比隆
極治之時爰率舊章聿修大報肇新寶輅儼千乘萬

騎之容謁欵紫壇罄一統二精之薦告成嘉祀翕受
龐禧霈惠澤以旁流燭皇明而四達盛德之事無疆
惟休臣職忝外祠身違近著奉璋濟濟莫陪多士之
班望闕葱葱均賴一人之慶臣無任

紹興十四年再任宮觀謝表

臣某言臣昨爲宮觀任滿陳乞再任續奉勅命候命
任滿日令再任臣已卽時望闕謝恩祇受訖官閑竊
寵有負明時秩滿自言更叨申命仰荷優隆之眷益
增尸素之慙臣某誠惶誠懼頓首頓首伏念臣家世
寒微材能淺陋頃由聖擢驟陟禁嚴用乃過于所期

功蔑聞于有補奉身去國尚聯內閣之榮無事居家
更食外祠之祿顧何施於薄技敢自訴於終更方懼
干誅忽蒙賜可俾遂桑榆之計獲依閭里之安內省
庸虛實惟僥倖此蓋伏遇 皇帝陛下懋昭大德纂
紹丕圖坐收太平之功默運無爲之化譬猶天地順
萬物之自然故于臣工閔一夫之不獲俯納由衷之
懇肆推從欲之仁大造難名固無容于報謝餘生未
盡尚永誓于縻捐

磨勘轉左朝請大夫謝表

臣某言今日九日伏奉告命以臣磨勘蒙恩轉授左

朝請大夫依前充徽猷閣待制進封開國伯加食邑
四百戶臣于當日望闕謝恩祇受訖課最無稱方俟
黜幽之命綸言下逮遽頒進秩之恩得過所期悸不
自定臣某誠惶誠懼頓首頓首伏念臣生逢休運夙
荷聖知問學不工徒抱朴忠之志材能已試蔑聞施
設之方旣謬職于禁途更猥叨于祠館官閑身逸處
已則優月要日成計功何有苟追偷安之譴敢希式
序之榮忽拜寵靈併增爵邑攷循名責實之政負尸
祿素食之慚豈伊庸虛有此僥倖茲蓋伏遇 皇帝
陛下翕受九德允釐百工爰稽考績之文率循三歲
寧失假人之器叙進一官有如樗散之微亦預階升
之列臣敢不恭承眷渥益勵操修景迫桑榆顧餘生
未能報國身居畎畝雖一日不敢忘君臣無任

紹興十五年正旦大朝會賀表

臣某言臣恭聞正旦大朝會應外任臣僚合進表稱
賀者獻歲發春爰啓三微之序體元居正式嚴百辟
之朝惟稽古之上儀自中興而創見神人胥悅夷夏
交歡臣某誠歡誠忭頓首頓首臣聞時莫重于履端
禮必先於明分肇新寶曆布一歲之始和大開明堂
會四方而來賀豈惟正班爵之義蓋以隆富宁之尊

屬在熙朝舉茲曠典恭惟 皇帝陛下回稽天德順履乾行合三統于一元既協夏時之正考六年于五服迺參周制之宜用詔羣司具嚴備物玉帛盛塗山之會鼓鍾奏鈞天之和并會星陳拱千官于北極嵩呼雷動祝萬壽于南山躋茲太平之文時乃盛德之事臣叨恩祠館謬職從班身滯周南念莫陪于執戟心存魏闕恍若侍于凝旒臣無任

紹興十六年郊祀禮成賀表

臣某言臣恭聞今日郊祀禮成大赦天下者升禋泰峙熙事告成旋蹕端闈恩書亟下繫一人之有

慶合萬寓以均歡臣某誠歡誠忭頓首頓首竊觀祖宗以來咸以祭祀爲重考之昭代參厥禮經謂因天事天亘百王而同軌故以聖繼聖率三歲而一郊垂裕後昆克遵舊典恭惟 皇帝陛下誕膺寶命纂紹丕圖治已格于敷天不擅成功之美禮特降于饗帝是彰報本之誠申大號以戒期詔司存而藏事具嚴法駕來羣后之駿奔欽若昊穹秩明靈而哀對方茂凝于景貺遂敷錫于庶民迎日之陽配天其澤用布積和之氣益昭明德之馨無疆之休于斯爲盛臣官叨近列職奉外祠祇薦一純莫預豆籩之執燭明四

華陽集 卷之十
極徒知葵藿之傾臣無任

丁母憂服闋從吉再任宮觀謝表

臣某言今月二日伏奉勅命以臣前任左朝請大夫充徽猷閣待制提舉亳州明道宮緣丁母憂服闋從吉特蒙聖恩授臣依前官職改差提舉江州太平興國宮任便居住臣已於當日望闕謝恩祇受訖親喪外除餘哀未能皇恩下逮舊寵惟新衰殘曷稱於寵光感戴惟增於雨泣臣某誠惶誠懼頓首頓首伏念臣學非考古仕本爲貧偶蒙聖哲之知擢與禁嚴之列方喜便私而求志不圖昧祿以挺災銜恤去官但

苟延於視息變除終制敢復望于恩榮忽詔命之俯臨叙班聯而如故惕然拜賜恍若更生茲蓋伏遇

皇帝陛下廣大配天照臨若日惟恐一夫之不獲由成萬物而無遺遂俾陋庸再叨寵渥隆天厚地知大造之難酬鏤骨銘肌豈餘生之敢愛臣無任

紹興十九年郊祀禮成賀表

臣某言臣恭聞今月十四日郊祀禮成大赦天下者三歲而郊旣備成于熙事一人有慶遂敷錫于庶民和氣所加歡聲相屬臣某誠歡誠忭頓首頓首臣聞國重祀典禮嚴事天自書契以來莫不舉彌文而咸

秩唯聖王在上乃能盡精意以感通考古所行於今
爲盛恭惟 皇帝陛下躬勤治道坐格時雍推大有
尚賢之誠享既醉太平之福爰思報本丕闡上儀備
法駕之嚴恭仰奉一純之荐恍神光之止集誕膺百
順之歸嘉與黔黎並蒙景貺恩書亟下霈澤旁流遠
同六合之氣增壽萬年之筴臣竊祿祠館叨榮從班
目斷鴛鴦莫預駿奔之列身同麋鹿但知率舞之勤
臣無任

磨勘轉左朝議大夫謝表

臣某言臣今月二十六日伏奉告命以臣磨勘蒙恩

轉授左朝議大夫依前充徽猷閣待制進封丹陽郡
開國侯加食邑四百戶差遣使如故臣已於當日望
闕謝恩祇受訖計三歲羣吏之治方懼黜幽奉一禮
十行之書遽叨進秩寵榮過望跼蹐靡容臣某誠惶
誠懼頓首頓首伏念臣志不自強材無所取蚤誤膺
于睿獎遂躡寘于華途誠已無功尚玷西清之列坐
而得祿更陪真館之遊身獲家居官無吏責自視衰
殘之久已慚天冒之多敢意洪慈載加式序班聯既
進爵邑更新欣蒲柳之再榮竦閭閻而動色茲蓋伏
遇 皇帝陛下功高遠古治格丕平任賢使能皆諒

華陽集 卷之十
材而授職積日累月率會課而遷官是謂殊恩均及
朽質臣敢不祇承命綍遵奉官箴造物無私固難施
于報効事君有義自當誓于糜捐

華陽集卷第十 畢

華陽集卷第十一

金壇後學于文熙校

表

紹興二十一年再任宮觀謝表

臣某言臣昨爲宮觀將任滿陳乞再任今月十八日
伏奉勅命候今任滿日令再任臣已卽時望闕謝恩
祇受訖奉祠苟祿歲滿何功從欲推仁詔令再任荷
皇慈之優卹拊孤跡以增慚臣某誠惶誠懼頓首頓
首伏念臣賦材甚踈學古不博誤被聖神之選躡躋
侍從之華坐竊恩榮蔑絲毫之報效空縻歲月覺氣

血之耗衰靜惟養拙之方亟上由衷之懇冒塵淵聽
方大懼於嚴誅祇奉綸言乃再叨於舊物當桑榆之
暮景獲閭里之安居自省庸虛實爲僥倖茲益伏遇
皇帝陛下堯仁天覆湯聖日躋體道觀能翕九德而
咸事量材因任成庶政以惟和故令樗散之姿亦玷
龍光之施恩同造物雖欲報而難名義有捐軀顧敢
忘於永誓臣無任

紹興二十二年郊祀禮成賀表

臣某言臣恭聞今月十八日郊祀禮成大赦天下者
上帝溥臨旣備成於熙事庶邦丕享遂普浹於湛恩

天人交通夷夏呼舞臣某誠歡誠忭頓首頓首竊以
有國之大饗帝爲難得其位而得其時斯舉百王之
典不欲疏而不欲數宜循三歲之規考古以來於今
爲盛恭惟 皇帝陛下性堯舜之孝悌躬禹湯之儉
勤地平天成坐致九功之叙兵寢刑錯聿臻庶政之
和治已格於不平禮必隆於大報夙嚴清蹕齋謁紫
壇儼千乘萬騎之容惟祇惟畏奉一純二精之薦是
饗是宜瞻權大之方升恍雲車而來下神心允荅聖
度彌謙拜貺于郊靡擅一人之慶配天其澤式均四
海之歡臣身忝從班職拘遠服奉璋就列莫階塵土

華陽集 卷之十一
之榮望闕馳誠但效華封之祝臣無任

除吏部侍郎謝表

臣某言臣伏奉告命除臣尚書吏部侍郎仍賜對衣金帶者辭榮晚歲敢萌再仕之心召對嚴宸遂玷六卿之貳恩加不次身若更生懇避莫回凌兢失措臣某誠惶誠懼頓首頓首臣聞圖治以人材爲急量材乃選部所專注擬分於四時品流動以萬計故中臺列職雖率屬以惟均而小宰一司視他曹爲最要欲革滯留冗濫之弊必求明敏練達之材而臣學陋無聞性迂寡合徒以朴忠之守誤蒙聖哲之知蚤擢禁

嚴茂聞績效半生去國空驚齒髮之衰無路報君更懼風波之險逮引年而得謝方謀食以偷安豈謂皇明曲垂簡恤起從田野頓增朽質之華入覲冕旒欽奉玉音之訓俯憐久困復置近班仍假寵於服章俾分權於銓綜退惟綿力何以當能不圖晚遇之榮乃過初心之望此蓋伏遇 皇帝陛下聖由天縱心與神謀廓離照以並觀奮乾剛而獨斷散羣壤植大開公正之門拔滯振淹促赴功名之會故雖小物不以遐遺內省叨逾若何報稱臣謹當恭承明命仰體眷懷激昂已退之心磨勵久荒之業桑榆晚景儻幸駐

於餘光駑蹇馳驅敢辭難於末路冀伸鄙志少荅洪
慈臣無任

除兼侍講謝表

駑蹇無堪復登於禁路龍光申錫沓至於旬時承命
自天措躬無地臣某誠惶誠懼頓首頓首臣竊觀睿
主臨御應期右文躬五帝之聖神臣皆莫及請六經
之淵懿義各有歸故微言每垂意於討論而淺識類
難陪於清燕在漢則有班張之博學於唐則推褚馬
之多聞儻使生於斯時尚恐莫能稱職矧如臣者何
足道哉占一藝而不精閱百年而向盡召從閑廢已

叨不次之除敢以空疎更冒最高之選顧懇辭而莫
遂揣涯分以難勝

云云 闕

除參知政事辭免表

臣某言臣伏蒙聖慈以臣辭免新除參知政事恩命
特降詔書不允者寵命過優非材莫稱忱辭上達聰
聽未回仰明詔之春溫撫危衷而夕惕臣某誠惶誠
懼頓首頓首伏念臣孤窮賤士遭遇四朝收之簪履
棄遺之餘試以銓衡煩劇之選勞能弗著幽黜是虞
敢期全度之私更委難勝之任擢升廊廟進貳機衡
顧茲政令出納之間實賴左右謀謨之助而臣病隨

年而日進心與力以俱疲激濁揚清尚懼曠瘵於一職殫智竭慮安能參贊於萬微矧今公道之方行宜擇真材而爲輔儻不量其非分必自取於疾顛用干難犯之威再瀝由衷之懇伏望 皇帝陛下廓大明而旁照矜小器之易盈不難渙汗之回俾遂謙撝之守庶於高位不至妨賢臣無任

除參知政事謝表

臣某言伏奉告命除臣參知政事尋具辭免伏蒙聖慈特降中使賜臣批荅不允仍斷來章者擢寘廟堂成命由於獨斷與聞機政謏材何以當能懇避莫回

凌兢罔措臣某誠惶誠懼頓首頓首竊以朝廷之上治化爲先崇建二府之官密贊萬幾之事所以發號而施令正賴同寅而協恭非得偉材曷輔大業如臣者蚤緣末學謬竊賢科從仕四十三年歷官十有八任服膺道義空白首以無聞妄意功名幸丹心之猶在晚遇聖神特達之眷召從閑退無慘之中俾貳銓曹進陪經幄吏員猥衆持衡莫著於微勞聖學高明侍席空慚於淺識方虞罷免忽誤超遷位高躡進於羣工命下駭聞於衆聽以是古俗儒而驟參國論以窮閭賤士而日近天顏載加品秩之崇增賁服章之

寵身所僥倖人莫比倫恩重命輕感深涕隕此蓋伏
遇 皇帝陛下懋昭帝德統御乾剛導群心於公正
之門措一世於光華之旦用人惟已靡先左右之容
以道觀能咸責事功之實知臣獲事三朝而未罹大
過察臣匪躬一節而特躋近班豈伊暮年有此榮遇
臣敢不祇承命綽恪守官箴非堯舜之道不陳用贊
明昌之運儻稷契之言有合肯忘蹇諤之忠誓畢此
生仰酬洪造臣無任

賜生日生餼謝表

臣某言伏奉詔書以臣生日特降中使賜臣羊酒米
麩者門弧記日敢上達於聰聞詔綽宣恩乃忽叨於
異數光生里巷愧溢心顏臣某誠惶誠懼頓首頓首
伏念臣仕雖爲貧才不逮衆導義方之往訓勉晚節
以遭時誤被眷知擢參機務千鍾後仕方興弗泊之
悲初度錫名載值始生之日豈伊孤藐更辱殊私敕
餼廩之豐儀兼醇醪而飫賜惟大烹之養甚盛宜以
與賢顧小人之腹屬厭實爲冒寵此益伏遇 皇帝
陛下道隆乾施德懋謙光至誠俯逮於臣鄰厚意特
將於臺餽必熟而薦獲伸永慕之懷惟孝可移誓竭
孤忠之報臣無任

除資政殿學士知婺州謝表

臣某言臣伏蒙聖恩除資政殿學士知婺州軍州事尋具辭免奉詔書不允已於今日十六日祇受告命仍賜對衣金帶者嬰疾祈閑方憂冒犯叨榮過望惟極驚慚臣某誠惶誠懼頓首頓首伏念臣世出窮鄉生逢休運先帝賜臣以上第特見褒嘉陛下擢臣於從班屢膺器使第材疎而識暗兼分薄而命窮雖受丘山之恩蔑聞毫髮之報逮迫暮齒猥參繁機責愈重而任有弗勝疾益加而力難自勉尸祿旣逃於深譴乞身更荷於軫憐竊惟秘殿之華資本優舊德至

若近畿之古郡宜付長材矧加命綽之榮仍責身童之寵顧臣朽質何以當能茲蓋伏遇 皇帝陛下大智燭幽深仁遍物謂臣服勞自舊未忘簪履之遺憫臣來日無多特借桑榆之景肆頒新命庸示殊私臣感極涕零言窮意拙陛辭有日尚期一望於堯天郡政久虛敢憚疾驅於周道臣無任

知婺州謝上表

臣某言近准告命除臣資政殿學士知婺州軍州事臣已於今月初二日到任交割職事訖貳政無功亟上祠宮之請分符過望更叨秘殿之華拜命若驚臨

民有媿臣某誠惶誠懼頓首頓首伏念臣生逢休運
晚遇聖知擢自山林得謝之餘置諸廊廟弼階之次
顧庸虛不學之質雖自竭於愚衷當睿知有臨之日
亦何裨於大政年益衰而告病位已過而將顛載陳
知止之情乞身退屏敢意均勞之典錫寵便蕃蒙聖
諭頗惜於去朝謂精力猶堪於共理逮辭天陛復遣
王人親灑奎章軫念猥加於被服申頒寶帶殊榮頓
聳於觀瞻辱隆眷之非常在近時而罕有矧茲星郡
實輔日畿民皆服化而有遷善輯睦之風路不當衝
而免過客將迎之苦何暮年之竊幸獲善地以偷安

舉而用下脫之字

茲蓋伏遇 皇帝陛下發揮聖神崇廣德業攬萬務
以當宁聚衆賓於本朝舉而用不與人而求備及其
老也每從欲以推仁致此孤微亦容忝冒臣夙遵宸
命躬布藩條眷竊位之暮年善俗稔聞於睿訓幸提
封之千里承流敢後於他人庶幾桑榆之收少答天
地之造臣無任

進土貢羅狀

右狀以別九州而作貢蓋分任土之宜供十筭以克
庭爰屆始喪之候非貴異物式舉彝章前件物本民
事於蠶繅救女工之組麗實諸厥篚仰輸三服之勤

掌在尚衣肅備九重之奉敢茲塵冒彌切震惶

賜曆日謝表

臣某言臣進奏院遞到宣一道伏蒙聖恩賜臣紹興二十八年統元萬年具注曆一軸臣已卽時望闕謝恩祇受訖者推策成書氣均調於四序授時協政恩首逮於庶邦祇拜爲榮奉行敢怠臣某誠惶誠懼頓首頓首恭惟 皇帝陛下天臨廣宇春育羣生探頤陰陽合乾行之密度同文夷夏前民用以頒條臣謹當佩服聖謨恪恭郡事仰日星霜露之變旣獲考於常經順析因夷隩之宜期助成於至化臣無任

再致仕謝表

臣某言近緣年老多病陳乞致仕今月十八日伏奉告命蒙恩特授臣左太中大夫依前充資政殿學士致仕臣已卽時望闕謝恩祇受訖陳力不能屢上乞骸之請推仁從欲更叨增秩之恩身旣返於田廬職尚聯於禁密始終厚遇朽謝奚堪臣某誠惶誠懼頓首頓首臣聞禮存致仕之文國重憫勞之典乃治古優賢之遺意實人臣歸老之至榮苟非其人未免有愧如臣者起家寒賤遭世盛明受寵三朝效官四紀晚荷非常之眷召從得謝之餘俾再仕於清時已爲

忝冒貳卿而聞政更極超踰上焉累世蒙休下則
舉宗被澤遠辭疾而去位猶分符於善邦凡茲寵數
之優隆皆過平生之分量報未先於縻隕年遽迫於
衰殘自知無補於公家豈敢坐靡於稍廩是祈退屏
以苟生存睿聽俯回既特從於至懇官聯序進仍曲
示於殊私顧終身無尺寸之伐可稱而末路荷保全
之恩如此慙顏莫寄感涕交流茲蓋伏遇 皇帝陛
下博愛而行義之宜至誠而盡人之性知臣樸直少
無能而老亦何爲察臣衰病心雖勤而力有不逮俯
憐舊物特畀殘生息駕駑駘雖戀軒而無路懷忠獻

畝猶結草以爲期臣無任

紹興二十八年郊祀禮成賀表

臣某言臣恭聞今月二十三日郊祀禮成大赦天下
者饗帝于郊函蒙於祉福配天其澤鼓動於風雷凡
厥有生罔不咸賴臣某誠歡誠忭頓首頓首臣聞禮
之大者非聖莫行誠苟至焉雖幽可格允屬亨嘉之
會克成孝奏之儀恭惟 皇帝陛下體統乾之粹精

廓大觀之中正德功兼茂遠配五三六經之傳符瑞
游臻豈止數千百所之盛肆昭大報丕藏彌文精意
上昭百鬼迪嘗於嘉薦明靈並貺三呼肅動於侍祠

華陽集 卷之二十一
靡專滋至之休亟布維新之令滌瑕蕩穢褒德賞功
聿彰晏粲之風於緝會通之典臣叨恩暮齒得謝窮
鄉望初日於紫壇阻陪顙俊接歡聲於白叟徒幸遭
時臣無任

皇太后慶壽賀表

臣某言臣恭遇 皇太后聖壽新歲八十 皇帝陛
下於宮中行慶壽之禮特降詔書推恩天下者上儀
肅備侈萬壽於東朝溫詔俯頒浹多歡於率土矧是
服乘之舊尤深舞抃之情臣某誠歡誠忭頓首頓首
竊以周紀太姒靡著年齡之永魯歌壽母蔑聞位號

之崇曷若熙朝兼隆備福 皇太后含光坤載育德
聖躬長樂尊嚴極天下之大養龜臺清淨得道家之
長生鴻算方隆綿區永賴恭惟 皇帝陛下仁同天
覆恩厚母慈三朝不懈於雞鳴務盡恪勤之禮萬歲
允符於芝瑞聿彰孝友之誠屬歲籥之更端奉寶觴
而稱慶欲廣躋民之化爰推錫類之恩眇古昔以創
聞實邦家之盛事臣嘗叨近列久去清朝不謂餘生
獲觀曠典退藏猷猷徒占南極之祥注想慈寧阻奉
蟠桃之獻臣無任

華陽集卷第十一 畢

金壇後學于孔蕪校

華陽集卷第十二

表

紹興二十九年加恩謝表

臣某言今月二十八日伏准告命以郊祀大禮赦恩加臣食邑三百戶食實封一百戶臣已即時望闕謝恩祇受訖禮備郊丘既錫萬方之慶身居畎畝亦均列辟之恩國雖有常臣實增媿臣某誠惶誠懼頓首頓首伏念臣叨逢興運嘗忝近班負至愚不學之才辱上聖非常之眷乞骸盛世方竊幸於餘生莫譬中

三百戶下食字數

壇曾莫陪於熙事敢期朽質尚冒殊榮不惟增衍於
本封且復併加於真賦明綸俯被感涕交流此蓋伏
遇 皇帝陛下道與時行人無遐弃推廣輝胞之界
特優簪屨之餘犬馬已疲知難酬於異顧雲天在望
徒銜結於危衷臣無任

顯仁皇后上僊慰表

臣某言臣伏觀今日二十一日 皇太后遺誥奄棄
大養號慟震驚殞越失措臣某誠悲誠感頓首頓首
伏以 皇太后誕生神聖追配姜任方享遐齡遽返
僊路恭惟 皇帝陛下孝愛本自於天性哀衷必過

於人情仰乞上念宗祊俯從禮制少抑晨昏之慕用
安夷夏之心臣退伏田野不獲奔赴闕庭臣無任

欽宗皇帝升遐慰表

臣某言臣伏聞孝慈淵聖皇帝厭世升遐中外臣民
號痛如一臣某誠悲誠感頓首頓首竊以 孝慈淵
聖皇帝體道淵淨逢時艱虞北狩未還僊期奄迫恭
惟 皇帝陛下友愛方懷於遐裔哀恫忽感於計音
天數莫逃聖情難處仰訖深思付託少抑哀摧上安
宗社之靈下副黔黎之望臣衰遲得謝退伏田野不
獲奔赴闕庭臣無任

紹興三十一年明堂禮成賀表

臣某言恭聞今月二日明堂禮成賀赦天下者肅九
筵而享帝於昭陟配之儀歛五福以錫民茂舉滌瑕
之典龐鴻所被舞蹈惟均臣某誠歡誠抃頓首頓首
竊以禮莫重於承天孝必先於嚴父考國家之大祭
侑祖考而迭尊刺經之中惟聖時克恭惟 皇帝陛
下至仁御宇盛德寧神推生民之功雖郊禋之屢展
繼下武之命顧宗祀而敢稽乃發渙音載揚熙事我
將我享而時物兩盡不怠不煩而情文孔昭萬壽無
疆既順成於天慶五刑有赦爰誕布於國章道洽幽

明光垂簡冊臣自初遭遇投老衰殘心存王者之堂
儼豆籩而可想身被野人之服望鷓鷯以難追徒竭
孤忠少陳善頌臣無任

紹興三十二年加恩謝表

臣某言臣今月二十六日伏准告命以明堂大禮赦
恩加臣食邑三百戶臣已卽時望闕謝恩祇受訖饗
帝合宮盛儀既舉均釐列位朽質奚勝臣某誠惶誠
懼頓首頓首伏念臣遇主一生致身二府捐軀報國
雖素志之未渝急景周年曾寸勞之莫效上聖嚴禋
而昭孝庶工祇載以盡誠初無奔走之勤敢意龐鴻

之逮茲蓋伏遇 皇帝陛下法天懋德稽古馭臣謂
夫祭大則澤宜豐不以人微而禮遂廢肆推茂渥俯
及衰蹤臣拜命凌兢捫心感懼明綸輝耀但知傳寶
於子孫病骨虺殘難復仰酬於覆幬臣無任

紹興三十二年冊立皇太子賀牋

伏聞皇太子殿下升儲位定受冊禮成不間邇遐同
深慶幸 云竊以問安祝膳孝篤於在三監國撫軍
義符於明兩克光盛典允屬元良伏惟殿下英粹凝
姿溫文懋德久繫人神之望是膺七鬯之司罄萬邦
而宅心知九鼎之增重臣退身毫及荷國恩深徒跂

仰於星輝阻進瞻於玉裕丹衷竊忭倍百常倫

禪位禮成賀太上皇帝表

臣某言臣伏覩詔書恭聞太上 皇帝陛下今月十

一日禪位禮成者肅詔春宮光傳寶位盛德之事曠
古罕儔臣某誠歡誠忭頓首頓首恭惟 太上皇帝

道合祖宗量包天地災圖再造備經三紀之憂勤黃
屋何心思享萬年之壽考運神謨而獨斷舉曠典以
必行禮方盛於建儲命亟聞於與子堯以位傳之舜
退處無爲之爲周之曆久於商永尊衆父之父臣生
平冒寵老病辜恩聆大號之聿頒撫孤忠而自感朝

華陽集 卷之十一
四
太公於五日阻陪仗衛之趨祝唐帝於千秋但切精誠之懇臣無任

皇帝登寶位賀表

臣某言臣伏覩赦書恭聞 皇帝陛下登寶位大赦天下者位正乾元宗祧永賴恩流渙號夷夏交欣臣某誠歡誠忭頓首頓首恭惟 皇帝陛下濬哲在躬淵冲稽古允若謳歌之咸戴居然曆數之有歸爰御飛龍遂安神器以聖繼聖遠追堯舜之蹤雖休勿休佇洽義農之化臣頃叨華近今困衰遲法座凝旒望龍顏而可想昕庭輯瑞造鵷序以無階臣無任

車駕巡幸起居表

邊檄交馳皇輿順動赫先聲於有截空大敵以無前臣某誠歡誠忭頓首頓首恭惟 皇帝陛下纂紹丕圖憂勤庶政憤犬羊之干紀戒虎旅以徂征詔舉時巡方肅鳴鸞之伏士爭賈勇咸均挾纊之恩恢復之期可坐而策即日餘寒在候六飛御途神動天隨聖躬萬福臣身居畎畝分隔雲霄仰跂清塵雖違顏於咫尺恪尊嚴令阻扞牧以奔趨臣無任

隆興元年冊立皇后賀太上皇帝表

臣某言臣伏覩制書恭聞今上 皇帝冊立皇后者

聖神傳序道必本於正家柔順居中禮益尊於大養
時乃鉅典浹于歡心臣某誠歡誠忭頓首頓首臣聞
首風化者治內于閨門明人倫者造端乎夫婦既格
移風之效復詒燕翼之謀徽數孔昭熙朝創見恭惟
光堯壽聖太上皇帝陛下儲神淡漠軫慮淵深念嗣
聖之紹休屬長秋之虛位聿求邦媛載穆坤儀五日
以朝太公肇新中饋之助二南之得淑女更懋始基
之圖臣夙荷殊恩欣傳渙號從鳴鸞而問膳想聞環
珮之聲瞻黼座以稱觴阻預簪纓之列臣無任

又賀太上皇后牋

臣某言臣伏覩制書恭聞 今上皇帝冊立 皇后
者椒房正位聿新教化之原寶冊流光肇式邦家之
慶禮成禁掖觀動華戎臣某誠歡誠忭頓首頓首臣
聞乾坤合德而茂育羣生日月並明而照臨四海自
昔有爲之主必資內助之賢選建柔良屬當熙洽恭
惟 皇帝陛下齊家憲古篤孝奉親惟中壺之久虛
慮陰教之或缺稟訓言於壽聖淑先窈窕之求發渙
號於昕朝或覲禕褕之盛一人受福百世垂休臣荷
至深投老無用不圖晚景獲覩上儀萬壽稱觴顧莫
陪於旅進二南紀德徒竊誦於流芳臣無任

又賀皇后牋

臣某言臣伏覩制書恭聞 皇后正位宮闈者柔儀告成陰教有主是興正始之道以立太平之基臣某誠歡誠忭頓首頓首臣聞御于家邦必本人倫之叙首以風教實由內治之修禮既行於會通時自臻於福祿恭惟 皇后殿下塗莘績慶姒推賢占符立馬之祥譽見濯龍之兆王后之五輅已均厚載之功仰天極之四星更廣照臨之惠臣無任

乾道元年郊祀禮成賀表

臣某言臣恭聞正月一日郊祀禮成者主神器以宅師夙懋靈承之敬陟泰壇而類帝肇迎滋至之休幽顯燮和華戎慶賴臣某誠歡誠忭頓首頓首竊以祀者國之甚重禮非時而不行因天事天尊祖聿嚴於大報基命定命承祧尤謹於初郊恭惟 皇帝陛下躬舜繼堯系唐接漢久協謳歌之載縻志燔燎之恭稟壽聖之成謨舉園丘之大典慮軍興而改卜心益務於專精用人正之初元事益光於故實昊穹昭荅瑞沚臻躋富壽於斯民永延洪於丕祚臣身居畝畝望絕霄雲願俊克庭難綴奉璋之列可封成俗但賡擊壤之謠臣無任

辭免召赴行在恩命謝表

臣某言臣近具奏辭免召赴行在恩命今月二十八日准尚書省劄子奉 聖旨張某一時老成朕所渴見已令趣召乃以耄老爲辭重違雅志可從所請令所在州軍常加存問仍賜羊酒者叨恩趣召 輒陳衰病之情從欲推仁更冒撫存之寵危衷激切感涕交橫臣某誠惶誠懼頓首頓首伏念臣素乏時才久愆旅力報國罔施於尺寸捫心空負於生平忽聞收召之音衆謂死灰之復焰自揣支離之骨獨嗟老馬之先疲與其上誤於使令孰若退安於分守是殫烟

幅仰覬哀憐載惟聖主龍飛尚阻造庭之敬况復邊隅雲擾尤非避事之時竊料微蹤必嬰嚴譴孰意乾坤之造曲昭螻蟻之誠垂溫旨以丁寧旣遂桑榆之志敕有司而存問更加牢醞之頒得過所期愧何以稱茲蓋伏遇 皇帝陛下接下以禮推恕及人知臣樸拙而非敢矯誣察臣病瘁而莫能彊勉靡愛優隆之澤用增枯朽之華臣荷眷益深謝生無路風雲遇合雖絕望於攀鱗畎畝優游但懷忠於結草臣無任 乾道元年加恩謝表

臣某言臣今月十一日伏准告命以隆興二年十一

月二十九日冬至詔書進封臣開國公加食邑三百
戶臣已卽時望闕謝恩祇受訖至仁恤祀特先事以
疏恩朽質辭榮復隨班而冒寵光生爵邑愧溢心顏
臣某誠惶誠懼頓首頓首伏念臣身起布韋家無儋
石偶玷高華之列已深溫飽之慚敢意垂年復叨異
數植圭貴重遂首冠於諸侯采地豐饒更增加於多
戶退念乞骸之久初無橫草之勞得之若驚悸不自
定茲蓋伏遇 皇帝陛下丕承大業肇舉明禋卜郊
爰徙於權宜霈澤靡嫌於過厚甫及初陽之日亟頒
大賚之音用間孤微俾偕序進臣桑榆景迫犬馬力
疲寶軸熒煌但覺光輝於梓社丹心感切無緣舞蹈
於瑱階臣無任

乾道元年冊立皇太子賀太上皇帝表

臣某言臣伏覩制書恭聞 今上皇帝冊立 皇太
子者大廷發冊肇基國本之安萬乘稱觴式表家傳
之慶縟儀創見至養彌隆臣某誠歡誠忭頓首頓首
竊以稟睿筭於慈闈正重明於上嗣是謂兩宮之兼
美誠非百代之可儔恭惟 光堯壽聖太上皇帝陛
下德冠二儀量包衆甫探至道於豨韋伏羲之上閱
成功於夏康周宣之時愛方樂於含飴禮遂觀於主

鬯子又孫而孫又子益知問寢之恭天占人而人占
天咸驗卜年之永臣叨恩惟舊臥疾增深需澤多方
但切遭逢之幸班朝五日阻陪蹈舞之趨臣無任

又賀 皇帝表

臣某言臣伏覩制書恭聞冊立 皇太子者儲宮正
位昭大慶於宗祧顯冊告庭浹多歡於夷夏臣某誠
歡誠忭頓首頓首竊以周室教行於三善漢家頌美
於重光蓋考震離之文取伴星海之象恭惟 皇帝
陛下以天地爲量以祖宗爲心躬大養而不違於睿
謨舉盛禮而獨高於往牒天下之本旣立聖人之功
孰加臣退窮山欽聞曠典雞鳴鶴禁遙知問寢之恭
鷺集螭墀阻預稱觴之列臣無任

遺表

臣某言臣伏爲疾患危篤上遺表者抱病衡門已絕
再生之望馳心魏闕輒伸將死之言臣某誠惶誠懼
頓首頓首伏念臣脫迹蓬蒿參華簪紱伶俜一介遭
遇四朝繇經濟之才踈故功名之念薄頃投閑散履
閱星霜 上皇擢貳政機冒寵僅周於歲律陛下再
頒召節卧痾莫造於天墀宸心終始以務憐異數便
蕃而存問乾坤大造獨厚孤微蒲柳殘生知難稱塞

方幸優游於樂土庶幾休養於餘齡而臣福過災生
鍾鳴漏盡負薪之憂寢劇屬續之息僅存雖人生如
過隙之駒光陰易捨然情迫若戀軒之馬恩德難忘
伏望 皇帝陛下體道御時配天立極施仁發政躬
周后之憂勤修已安人法唐堯之慈儉懷柔夷狄褒
禮忠良上遵一定之規模益固無窮之基緒臣形將
就木志切傾葵想清禁以冤迷撫殘骸而涕隕上茂
陵之書而獻佞肯效前人結輔氏之草以酬恩尚期
異日臣無任

華陽集卷第十二

畢

華陽集卷第十三

金壇後學于文熙校

疏

徽宗天寧節功德疏

乘天德而出寧誕記流虹之瑞佇時巡之歸格遙傾
就日之心虔叩覺慈仰祈睿算庶竭涓塵之助少酬
覆燾之私 道君太上皇帝伏願六氣御和三靈垂
佑迎太公而還漢載嚴五日之朝慶靈武之興唐永
奉千秋之節

欽宗乾龍節功德疏一

大德必得其壽固自享於延洪忠臣遠不忘君更欲
申於報効屬紀誕彌之節虔依無碍之慈同厥有生
咸傾善頌恭惟 淵聖皇帝陛下宅心齊聖體道淵
冲恭勤出天性之自然孝友造人倫之極致南薰應
律徒知揖舜之風朔野時巡猶隔就堯之日伏願密
回天鑒坐擁神休兩國交歡佇六飛之旋轡萬年祝
聖偕百辟以稱觴

二

上聖篤生肇千秋而紀節羣心胥慶敢一日而忘君
注想玉毫投誠金地庶憑願力上贊皇齡 孝慈淵

聖皇帝陛下伏願擊道德之精剛玩神明於昭曠自
天降福與時偕行返瑤池八駿之遊對周邦之咸喜
享嵩嶽三呼之祝隆漢祚於無窮

三

純乾紀月載震開祥北望堯天未報生成之德仰瞻
佛日用伸祈嚮之私 孝慈淵聖皇帝陛下伏願體
道淵冲玩神昭曠問途牧馬回法駕於襄城占瑞老
人對靈光於南極

四

葵藿微生猶知向日簪紳舊物敢忘愛君載臨震夙

之辰寅奉熏修之禮異憑法力默佑清躬 孝慈淵
聖皇帝陛下伏願德隨日新誠動天監六飛在御早
回朔野之巡萬壽無疆克配南山之詠

五

配天盛德欲報難名彌月紀辰敢忘善頌庶竭涓埃
之助少伸犬馬之私 孝慈淵聖皇帝陛下伏願上
帝眷臨百神儼衛駕雲龍之駟按平路以南旋占箕
翼之星固皇齡而北拱

六

羲日南交初屆長羸之候堯雲北望載臨震夙之辰
聲震宇以均歡竭忱辭而請祝 孝慈淵聖皇帝陛
下伏願神祇祖考昇景福以彌昌山阜岡陵茂皇齡
而益固

乾龍節滿散道場文

虹渚開祥屬此正陽之月雲天在望曷勝就日之心
用虔祝於皇齡輒仰憑於慧力 淵聖皇帝陛下伏
願三靈垂佑六氣御和至孝自格於神明盛德永膺
於福祿順斗杓之南指亟旋八駿之遊過嵩嶽而開
呼永享萬年之壽

高宗天申節功德疏一

天其申命用休誕紀生商之節臣能歸美報上同傾
戴舜之心仰叩覺慈虔申善祝 皇帝陛下伏願仁
恩天覆威令風行復廟社於中原茂本支於皇祚坐
明堂而朝萬國閱八千歲之春秋疆戎索以禦四夷
作億兆民之父母

二

盛德在火流光繞樞開長發之祥普天同慶効華封
之祝擊壤成謠 皇帝陛下伏願宗社安安蠻夷率
服國史播豐年之詠司空廣輿地之圖治定功成案
六經而較德天長地久參萬歲以成純

三

赤伏標符爰啓中興之運瑤光貫月肇開長發之祥
屬令節之載臨罄綿區而申祝顧叨法從敢怠愚誠
皇帝陛下伏願聖德上昭皇威遠暢成大功以安四
海歛厚福以浸黎民載新興地之圖恢中原於有截
誕受泰元之筴纂丕祚於無疆

四

惟皇作極被四表以尊臨申命自天垂萬年而永固
爰屆誕彌之節載傾請祝之誠庶竭涓埃上俾海岳
皇帝陛下伏願參天地而化育並日月以照臨威疆

成於道德而九服來王孝弟通於神明而兩宮返國
築靈臺而偃伯用彰無敵之仁開壽域以躋民同享
太平之福

五

彌月屆期協火德自然之應後天祝算叩金僊無碍
之慈顧微塵何補於丘山維向日自傾於葵藿恭惟
皇帝陛下聰明體道孝弟通神繼好息民浹歡聲於
遐邇刺經作制新隆典於明昌載臨出震之辰宜獲
自天之佑伏願四時不忒萬國咸寧稽三百五篇之
詩旣醉已歌於至治採七十二君之制升中遂告於

成功

六

皇天眷命上帝篤生肇八荒再造之基祥開華旦垂
萬世無疆之福懽浹羣倫用傾向佛之心仰罄祝堯
之請 皇帝陛下伏願握符御極旋乾轉坤四時平
而風雨時五穀熟而民人育新又新而不怠德銘益
懋于湯盤朔更朔以無窮神筴彌增於漢曆

七

火德當陽方啓明昌之運樞星照野載臨震夙之期
爰卽寶坊聿嚴法會 皇帝陛下伏願體道淵靜儲

神穆清自本自根長上古而不老卜世嗣大曆
以無疆

八

蕤賓在候昭盛德於炎精長發其祥下靈光於華渚
於赫生商之旦有開復禹之基屬令節之載臨均綿
區而申祝皇帝陛下伏願三靈助順六合同風政
陶陶而日新福簡簡而滋至三萬里農桑之本版圖
益廣於邊封八千歲春秋之期寶曆彌增於睿筭

九

表正萬邦惟君爲大靈承上帝何福不除矧當彌月

之期更切後天之祝皇帝陛下伏願誕膺百順不
式九圍老人呈南極之祥神筴授泰元之秘我無爲
而自化熏陶益廣於堯仁聞盛德而偕徠玉帛常趨
於禹會

十

道莫大於帝王方隆景運功已參於天地何假頌言
惟載鳳之昌期實綿區之共慶欲效消塵之報不勝
癸藿之傾爰卽淨坊聿嚴法會皇帝陛下伏願體
道淵靜儲思穆清時和歲豐而叶氣橫流禮制樂作
而頌聲洋溢文謨武烈冒率土以歸仁舜日堯天垂

後天而難老

十一

瑤圖在御萬方瞻北極之尊虹渚呈祥百辟獻南山
之壽茲仰憑於佛力異申祝於堯仁 皇帝陛下伏
願六氣御和百神受職考七十二君之錯事聿陳梁
甫之儀閱千二百歲以脩身盡得廣成之道

十二

千齡撫運爲天下君萬國傾心祝聖人壽况忝服乘
之舊載逢震夙之期爰卽寶坊用嚴法會 皇帝陛
下伏願乾行剛健離照光明體道御時道甚大而王
亦大立政勸化政日新而德又新坐成不宰之功永
嗣無疆之曆

十三

天佑寶圖時生真主百靈儲祉咸趨震夙之期四海
均歡敢後延洪之祝 皇帝陛下伏願懋昭大德遠
駿有聲並日月以正明運陶鈞而獨化天開地闢揮
八極以凝神治定功成握萬年之景命

十四

星火當天五百歲篤生於上聖香花供佛三千臣同
竭於一心庶憑覺海之慈仰贊壽山之固 皇帝陛

下伏願體乾之健如日之升建皇極以錫庶民坐明
堂而朝萬國魚鳶遂性樂舜德於薰弦箕翼占祥永
漢圖於神筴

十五

雷厲風飛方大中天之業虹流電繞載臨彌月之期
望玉階以歡呼叩金僊而請祝
皇帝陛下伏願決
柔用夫行健乘乾赫厥聲而耀厥靈與乎神而進乎
智持有道之勝皇都坐復於輿圖受無疆之休睿筭
永齊于箕翼

十六

成功不居坐享無爲之樂大德必壽欣逢載夙之辰
眷踈遠之微蹤負恩私而莫報唯憑善頌少效愚衷
光堯壽聖太上皇帝陛下伏願體道希夷儲神淵靜
擴孫謀而詒燕開寶運之亨嘉萬乘稱觴永尊天子
之父千齡御辨同符象帝之先

十七

星樞紀瑞方申過曆之期鸞輅陳儀肅奉稱觴之禮
事獨高於曠古歡允浹於羣黎曾是叨恩敢忘善頌
光堯壽聖太上皇帝陛下伏願游神昭曠問道崆峒
體太極以函三法乾元而用九坐觀聖子述成萬世

之功永鎮皇圖安享千秋之養

十八

赤符應瑞旣成復古之勲黃屋非心爰享後天之筭
式逢誕節更瀝懇祈光堯壽聖太上皇陛下伏願
氣襲堪輿心游淡漠迪亨嘉於豐豫齊久大於乾坤
舉漢帝之玉卮益隆至養受唐臣之金鑑永鎮丕圖

天申節開啓道場文

炎帝執衡司夏誕彌膺火運之昌文王受命作周光
祚協帝齡之永顧盛德何施於善頌惟羣心欲效于
愚誠恭啓法筵仰祈慧照皇帝陛下伏願惟皇建

極申命自天靖疆場以無虞洗甲兵而不用開八荒
於壽域均調天地四時之和朝五玉于明堂永作神
民萬物之主

天申節滿散道場文

流電繞樞兆一人之有慶斷鰲立極均萬寓以蒙休
載臨彌月之辰祗率周行之士咸趨法席用竭愚誠
皇帝陛下伏願彝倫叙乎九疇治道貫乎三極風雨
時而五穀熟于戈戢而四海平如日之升益懋昭于
盛德後天而老期永御于洪圖

會慶節功德疏一

華陽集 卷之三
膺正統以當天光啓繼明之運紀誕彌於良月丕昭
受命之祥仰叩能仁虔申善頌 皇帝陛下伏願新
美庶政緝熙大猷三靈吐格於繁禱四海皆臣于盛
德盡事親之道萬年均壽聖之歡簡上帝之心百世
邁岐周之歷

二
甲觀開祥仰千齡之盛旦祗園獻祝竭四表之歡心
矧夙荷於殊恩顧敢忘於善頌 皇帝陛下伏願百
靈薦祉六合承風單于趨渭上之朝博士刺經中之
制天長地久參萬歲以成純子孝父慈會一人之有

慶

三

爲天下君上帝啓誕彌之慶祝聖人壽黎元均愛戴
之心益有生蒙雨露之恩念無路效涓埃之報肆殫
願力仰叩佛蒙 皇帝陛下伏願體道御時配天立
極漢廷多暇躬太公五日之朝周歷無疆介君子萬
年之福

四

受命當陽咸仰誕彌之慶傾心向佛虔伸頌禱之勤
異仗慈光聿崇睿筭 皇帝陛下伏願德參上古業

華陽集 卷之三
廣中天纛弓矢而戢干戈考制度而正禮樂燕周王之孫子益茂本支奠漢室之山河永觀帶礪

皇太后生辰功德疏

道盛母儀夙肇生商之慶祥開宮壺戴臨夢月之期爰啓琅函仰祈鴻筭 皇太后殿下伏願百神薦祉六氣御和歌聖德于思齊本支益茂奉慈顏於長樂壽考無疆

皇后生辰功德疏

紫房正位夙著於柔儀黃氣占祥載臨於誕日虔申頌禱仰贊延洪 皇后殿下伏願道集坤元福流震

索承顏長樂同臻萬壽之期協德關雎永輔一人之慶

徽宗皇帝追薦道場疏

弓劍上賓痛龍胡之莫附香花修供捨檀海以疇依法會有嚴威神如在超登彼岸願同梵釋之遊陟配在天永錫邦家之福

寧德皇后追薦道場疏

坤儀永閱曷勝長樂之悲佛法無邊用啓華嚴之供人天來會鍾唄宣揚仰祈如在之神遂證無生之果

人天不會輕與宣揚時時時之弊茲為難生之果

中其不閱得身樂之悲制去無感用治華風之共

學高星可身事首身龍

古之來不與時之節

生官自通友時時時登如年際同其對之發海明

一之古可身事首身龍

金壇後學于孔蕪校

一之古可身事首身龍

一之古可身事首身龍

華陽集卷第十四

金壇後學于孔蕪校

劄子

論獄囚瘦死劄子

臣聞詰姦禁暴莫重於獄敗法亂政莫甚於治獄之

吏恭惟陛下自即位以來每發德音下明詔未嘗

不以欽恤刑獄為先然近歲吏姦成市未能遽革或

緣貨鬻或挾怨仇或望風旨或私逞威勢捶楚之下

欲致之死地往往先以病聞及其已死縣匿之不以

申州州匿之不以申監司上下相蒙難以稽察按紹

華陽集 卷之十四
興斷獄勅諸囚在禁病死歲終通計所禁人數死及
一分則官吏以次斷罪罪止杖一百此固法之善也
然繫囚日死官吏斷罪之文初未嘗舉行夫欲懲其
苛慘而罪止于杖責之既輕復爲虛文宜其吏之不
知畏也昔漢宣帝詔郡國歲奏繫囚以掠笞若瘦死
卽坐名縣爵里丞相御史課殿最以聞臣愚欲自今
以後令州縣月具繫囚存亡之數長吏結罪保明申
提刑司歲終舉行斷罪之法仍每路比較一州一縣
死囚最多之數具當職官吏姓名取旨黜責其最少
處亦乞量行褒賞如宣帝故事庶幾慘酷稍憐人無

橫害以廣 陛下好生之德取進止

乞久任劄子

臣聞張官置吏本以爲民與民親者莫如監司郡守
前代以來尤重其選然未有不使之久任而責其成
功者也國家稽古建官舊以三年爲任近歲員多闕
少率二歲爲成資以古驗今已不爲久使人人得成
資而代猶足以稽其功效竊見比年監司郡守往往
數易或到任未滿一年或纔三兩月輒代去夫郡守
治一州監司總一路其風俗之厚薄吏胥之欺詐簿
書訟獄之繁夥非一朝一夕所能省察也借使材術

華陽集 卷之十四
過人亦必遲之歲月然後可以措手今乃不待席煖
數見換易前官視事日淺未究設施而後官已至端
緒復亂人懷苟且迄無成功又况遠近送迎士卒疲
苦往來饋給州縣煩費當此艱虞之時豈無所損哉
臣愚欲乞檢會二年成資旨揮申嚴行下今後監司
郡守除以罪去不問久近其他並令成資如朝廷選
材召擢亦必到任一年方許受代所貴吏得安職民
受實惠取進止

乞令帥守條例利害劄子

臣竊觀陛下卽位以來勵精圖治崇諫諍之風而
虛心於敢言之士懋緝熙之學而留聽于勸講之臣
猶以爲未也乃自從官下至百執事皆令以次轉對
可謂得聽納之道矣然而州郡帥守於民尤親講求
時務亦應有所論奏雖詔書數下中外奉承其間尸
官循嘿之人曠日持久曾未聞以讜言至論上徹聖
覽甚無爲也臣伏見 仁宗皇帝詔沿邊郡守替日
各具民間及邊事五件奏聞蓋欲躬垂明聽以察四
方萬里之遠然則凡在官者孰敢不究心所職哉臣
愚欲望 陛下舉行仁宗故事應諸路帥守不以到
任久近至替日各令條列本處利害五事以上畫一

具奏其沿邊州軍仍論邊防急務悉可行於今者庶
幾人皆竭誠盡慮仰副 陛下求言之意取進止

乞嚴邊備劄子

臣竊觀國家自遭夷虜之難繼以姦臣僭竊中原陷
沒社稷阽危此天下之所痛心疾首恨未有以報也
比來川陝之師捷書屢至賊境內擾虜氣沮衄是乃
上天悔禍之時中外人心亦少快矣然臣竊有所慮
者蓋群情樂于苟安事變生于所忽天不假易道貴
難圖今雖警報稍寧然所以自爲備者豈可一日廢
也又况兇渠假息陰連黠虜深謀詭計緩急相應則

羸師張我或未可知傳曰上兵伐謀又曰先爲不可
勝以待敵之可勝正今日之先務臣愚欲望 陛下

明詔有司日

御名

日常若寇至應沿邊去處無得徹

警要令斥堠益遠關防益密訓士卒察姦細以至城
池樓櫓器械之屬亦宜常切按視以時修葺如此不
唯物各素具可以應卒抑使士氣不惰國勢自彊恢
復之基於是在取進止

乞詔大臣兼領史事劄子

臣聞自古帝王之興必有信史備載一時行事所以
昭示天下後世不可缺也恭惟 陛下纘紹丕圖于

今七年動勞萬機夙夜不怠將以恢中興之業比迹周宣漢光而東觀日曆未有述焉頃因臣寮上言嘗詔論撰然自艱難以來簡編散逸時政起居本末不備方且重行搜訪內則關問於百司外則取會於州郡既以節目繁夥供報爲難又緣秘書省權輕諸處視爲不急雖復文移往返未有汗青之期深恐歲月侵久事或失實愈難考正竊見今之著作局乃昔之史館祖宗時嘗以宰臣兼之故史權增重臣愚欲望聖慈若稽故實特詔大臣兼領史事而委以筆削之功庶幾聖朝盛典粲然備舉天下幸甚取進止

論買牛筋角劄子

臣竊謂方今國家之急有二一曰治兵二曰務農治兵所以強國務農所以足食二者相項以濟殆難以偏廢也夫兵無弓矢固不可以戰然農無牛亦安能服田力穡此正宜今日之所圖者臣伏見近日軍器所打造弓一萬張計用牛筋六千七百四十五斤角一萬一千隻績奉 聖旨分一半下浙東收買此廼陛下留神武備修治器械以攘夷狄深得夫宣王復古之意矣有司奉行旨揮獨患筋骨數多無人出賣州郡決不能以時應辦益一牛得筋不過數兩約用

三牛可得筋一斤今所買六千餘斤無慮二萬牛矣緣自兵火以來遠近耕牛驅虜屠殺殆盡至有以人代耕田畝荒蕪莫之墾闢頃者朝廷察知故嚴立罪賞禁人屠殺自是人稍知戒然所在孽養未久正須遵行法禁以俟蕃息今乃分科筋角下州縣收買州縣必須科下人戶人戶之牛自死者其筋角既已依條納官緣何更有出賣深恐官司務欲辦事妄行促迫則小民畏懼勢須殺以應命顧罪賞如此誰敢輒殺設或姦猾之民以所須筋角爲名遂復恣爲屠割不知州縣何以處之欲加以罪筋角無所從出欲縱

之法今不行而殺牛滋多益廢耕耨是於國家務農之意有未至也臣訪聞溫台衢婺等州昨爲隣境盜賊竊發其間豪民多緣扞禦收蓄良弓今筋角昔揮旣行所買必不能足數臣愚欲望 聖慈下三省相度除一面收買筋角外浙東人戶能以堪用好弓力及八斗以上者赴官投賣卽今州縣每張約筋角若干而給還其直總計所買弓補充今來所降筋角之數如此不唯收買易辦且得存養耕牛農人不至失業兼使民間兵器以漸納官是一舉而獲三利也區區管見干犯天威無任惶悚戰懼之至取進止

論土豪獄久不決劄子

臣聞臯陶告舜曰與其殺不辜寧失不經好生之德洽于民心夫以德洽民心其本在於名_御罰此虞舜之治天下所以歸仁仰惟陛下纂業中興憂勤不息監觀庶獄尤務哀矜既已臨遣使輶宣諭德意而又親灑宸翰刻石以詔有司唯恐淫刑以逞濫及無罪是宜四方風動下無冤民然臣竊觀軍興以來每遇寇亂村人徃徃乘時倚勢羣輩剽劫以至殺人放火時或有州縣尋行根治罪大而左驗明白者固已卽時就戮其情由曖昧黨與牽連則必逮繫證案姦吏

受賕滋漫及于平人是致獄久不決而斃於纍囚者不可勝數小人見其如此或挾讐怨或規賄利轉相告訴無有已時故雖歲月深遠事旣滅息而官司因其告訴輒復收捕驗治是以獄訟愈多而人情不能安處方其事變擾攘無知之民違法作過何所不有罪在一時豈無誣誤自建炎已酉至今經涉五年推窮誅治亦足以鉏姦去惡使民知畏矣然而囹圄置對猶或有未決之囚官吏受辭無以絕方來之訟近者紹興府亦嘗申請正言金人占據去處而不及他盜紛擾之地止言土豪專輒斬殺之罪而不及細民

華陽集 卷之十四
乘時殺傷等事雖已特降旨揮又不徧及天下似于
聖威推行未廣臣愚欲望陛下載頒詔旨截自紹
興元年正月一日以前應因寇亂聚集作過及殺傷
等事一切不問州縣勿復受禮如事已在官而未結
正者並令釋放所貴曠蕩之澤普浹天下雖虞舜好
生無以過此取進止

論淮南官冗劄子

臣伏見淮南州縣數經殘破比年餘間稍稍歸業正
在朝廷加意拊循庶幾德澤下究創痍漸復然其間
官吏設員太冗裁減未盡浸漁騷擾爲害不細甚非

勞來還定安集之意方今國家大勢以東南爲重自
江以北皆吾屏蔽苟欲經理天下則淮南當在所先
不可謂殘破之地而遂忽之且州縣民旣不多則事
亦隨少事少則冗官濫食亦安所用若不痛行減省
將見積日累月害民益甚臣愚欲乞每郡自太守而
下除酒稅主兵及簽廳官各存留一員刑獄倉庫止
一員兼治其餘並罷每縣自知縣而下存留酒稅官
一員丞簿尉職事亦止一員兼治其餘並罷所有管
下巡檢及外鎮稅官除係衝要去處依舊存留外餘
悉罷之如此則減員雖多必不至乏事俟將來歸業

者衆州縣事體寔盛却相度逐旋增添所貴治有條
理民得休息伏望 睿慈特降詔旨施行取進止

論儲蓄劄子

臣聞國家無九年之蓄曰不足無六年之蓄曰急無
三年之蓄曰國非其國也是以立國之道穀食爲本
量入制用以備凶災方無事時尚當如此而况艱危
之際軍師仰給有倍於平日者乎國家數年以來養
兵益衆月費廩餉無慮數十萬斛所幸頻歲登稔不
至缺乏然而朝斂暮散僅了目前未聞有所蓄積古
人嘗謂六歲旱蓋言豐凶相代不可以爲常也萬一

豐歲以後繼年穀不熟民無以輸則將何以爲計臣
竊見春來霪雨不節二麥旣傷而秋成又未可知要
當預爲之圖訪聞民間猶有積穀可以接新二麥雖
傷將來薄收穀價亦必少減臣愚伏望 聖慈委諸
路漕臣及茲民有餘粟之時早行措置或從官司允
那糴買或行民戶預行椿留各條具委令如何可廣
儲蓄限一月上之戶部相度申尚書省取旨施行取
進止

華陽集卷第十四 畢

華陽集卷第十五

金壇後學于文熙校

劄子

乞舉將帥劄子 給事中
時所論

臣聞三辰不軌擢士為相蠻夷不恭拔卒為將仰惟
陛下勵精求治士之懷材抱藝者莫不以次進用獨
將帥之臣推擇未廣方今夷虜尚熾邊陲未能徹警
朝廷所恃以却敵禦侮者不過大將數人而已各據
要害按甲休兵則未見缺事萬一烽火四起必將分
道出師前擊後援若非備豫何以應卒故臣謂爪牙

之選在今日尤當拔奇取穎以防緩急夫前世經武之事每不乏人者不必皆取良家子苟其材智勇略足以益衆雖在微賤擢實三軍之上不以爲嫌所以販縉屠狗盜賊奴隸罪亡之餘率爲一時名將國家自艱難以來兵氣未振然不可遂以乏材厚誣天下竊意韜略之士固有沉埋困躋姓名不得上聞者正須上之人篤意求之耳臣愚欲望聖慈特詔中外文武臣寮廣行搜訪有能練達戎律熟知虜情忠勇可備將帥不問有官無官或隱於山林或見在行伍卽具姓名聞奏然後召問審考不次擢用庶幾如古拔卒爲將之意取進止

乞修戰船劄子

給事時
所論

臣竊觀自古興師却敵阻江河以爲險則水戰之具不可不備岑彭以樓船露橈斬任滿於荆門周瑜以蒙衝鬪艦走曹操於赤壁此已往之明驗也邇來朝廷講究防秋之策不爲不熟唯水軍一事未有措置臣固未論其他且以臨安言之車駕駐驛於此邊江接海舟楫之利最爲緊急舊有戰船不少樓櫓器械亦略具備今旣歲久徃徃破壞置之枯河悉不可用逐船篙工戰卒又復取其健者分隸諸將目今但存

空名萬一倉卒有警乃始簡料久廢之卒而修葺旣
弊之舟其爲計晚矣傳曰不備不虞不可以師近日
邊陲探報尚未寧息所以備禦之方政當每事儆戒
况虜情難測左實右僞聲東擊西其出沒雖遠在江
湖千里之外安知猪突豕勇之計不出於吾指顧之
間是則海道迅速尤須過於隄防臣愚欲望聖慈特
詔有司將行在戰船棹卒速行修治令統制官糾集
訓練以備不測所有其餘沿江舊有水軍去處亦乞
劄下所屬施行取進止

論三衙兵少劄子

臣竊觀漢周勃以北軍安劉氏唐李晟領神策收復
京師此皆天子禁兵入衛王宮出扈乘輿所以張皇
武威遏絕姦宄一旦緩急取之左右足以勘難國家
自祖宗建立基本尤以三衙爲重方今盛時所總貔
虎之士無慮數十萬艱難以來闕額不補軍政蕩然
名存而實廢 陛下時巡方岳駐驛之地當使兵衛
森列盛於平日而尺籍伍符迺益加少未聞有所措
置方今外有不庭之虜內有竊發之寇而所謂五軍
者雖冠於神武之名營屯輦轂要之皆出戰之士至
於扈蹕以彊天下則正屬三衙是謂天子爪牙之任

昔段秀實有言猛虎所以百獸畏者以有爪牙也爪牙廢則狐豚特犬悉能爲敵可不深念哉臣愚欲望聖慈特詔大臣取殿司及馬步軍兵籍斟酌多寡講求補卒之法務得驍銳勇果之衆專一訓練以嚴宿衛之列庶幾國勢內重陰有以折姦雄之心天下幸甚取進止

論黨籍之家推恩泛濫劄子

臣聞錄冤恤孤振淹拔滯帝王之盛德往時元祐臣寮子孫流落困躓陛下憐其名族不遭曲加恩惠德至渥也然臣考之黨籍見於石刻者二百餘人前後

推恩已多而來者不止遞相援例無有限極或白身不試輒命以官或先次注授不問資格一門之中及其子若孫又復旁連弟姪由是上則多泛濫之弊下則啓僥倖之門原其始也本欲加惠忠良之後及其行之稍過則不能無弊臣以謂黨籍之家固宜有以優恤之但不可不爲限制方今吏負狠多銓曹無闕可擬若更以此占奪名次則孤寒平進之人愈見留滯臣愚欲乞詔有司將元祐黨人擇其顯有名德者方許子孫陳乞恩例一次今日以前已經推恩者不得再有陳乞其間人才卓然可用自當別聽推擇

區區管見冒瀆聖聽如有可采伏望特賜睿旨施行
取進止

論公道劄子

臣聞人材治世之具賞罰勵世之柄是二者其權制
於人主而所以行之則責在大臣用人材而行賞罰
其要不在乎它曰公而已矣惟公則能生明一措私
意於其間必將昧於所見顛倒錯繆未見其能治也
蓋用人材而不公則宜退者進可用者斥是出於私
好惡也何以示甄別行賞罰而不公則爲善者不見
錄稔惡者或幸免是出於私喜怒也何以示勸懲書

曰以公滅私民其允懷若乃以私滅公則積日寢久
毒流於下民將胥怨何懷之有臣竊觀 陛下總攬
權綱慨然獨斷則前日不公之弊無患於不革然臣
尚慮左右玩習之久未能盡絕私意精白以承休德
欲望 聖慈特詔一二大臣專以至公之道經綸天
下人之賢者雖讎必舉其不肖者雖親必黜高爵厚
祿旌有功則勿吝嚴刑峻罰當有罪則勿恤如是而
日御名一日無或致忽於其間則朝廷之上舉動皆合
於公論庶幾無負陛下委任責成之意取進止

論守令害民劄子

臣聞張官置吏凡以爲民也陛下勵精圖治勤求民瘼詔書爲民而下者十常八九非不丁寧懇切而州縣官吏奉行不虔尚多背公營私剝下媚上恣爲貪虐略無忌憚致使斯民日受其弊無所赴愬爲縣令者害及一縣而太守不敢誰何爲太守者害及一郡而監司未嘗按發蓋自比年以來上下相蔽習成此風恬不知怪臣愚欲望聖慈特降詔旨遣清彊官循行天下以察訪吏治夫遣使之意止欲慰安黎元不必張大聲勢以致騷擾所過郡縣問民疾苦受其詞訴饋遺燕犒一切杜絕庶革請託之弊以專發擿之

公其監司及州縣官吏不能宣上德意而爲民害者具姓名申奏悉行罷黜蓋方今天下之事上關聖慮者非一然以臣觀之安民情固邦本莫先於此儻遂施行天下幸甚取進止

乞除民事一條劄子

臣聞立法所以防姦法旣具矣又增益之則條目苛碎而猾吏得以舞文姦必愈甚臣竊見祖宗以來愛養生民唯恐貪殘之吏有以傷之故立公私贓罪三等之法俾吏部量其所犯而限其注擬行之旣久輕重咸得其當頃因臣寮建議遂增置民事之科應緣

民事被罪者並不得注知州軍通判知縣差遣夫守
令通判親民之官苟有所犯未有不干涉於民者使
其人實由姦貪而犯賊私之罪則坐以重法固不足
卹萬一素行廉勤偶陷公過而或傳致於民事遂令
終身不入親民之選則人才必有廢弃者豈不重可
惜哉又况刀筆之吏因此執疑似之迹故生沮難或
致交通賄賂爲害不細臣嘗取吏部民事條令觀之
始於紹興六年而相繼申明衝改議論紛紜至今猶
未止也蓋天下皆知其不便唯一時權臣欲專予奪
之柄故不肯遽罷但令申取朝廷指揮殊不以紊亂

祖宗法度爲意臣愚欲望 陛下特降睿旨將吏部
民事一條早賜蠲除所有百官注擬及公私賊罪格
法並依舊制施行庶幾法令簡明易於遵守取進止

乞重監司劄子

臣竊謂今之監司乃古部刺史朝廷付之一路所以
督察守令其權不爲不重夫守令之治其大略有七
一曰宣詔令二曰厚風俗三曰勸農桑四曰平獄訟
五曰興學校六曰理財賦七曰實戶口使守令得人
而七者皆舉天下無餘事矣苟不得人則按發之職
實在監司故夫論治道者謂得百守令不如得一監

司比年以來所在守令姦貪不法未嘗見監司有一按發者此無他蓋由用非其人或以資淺望輕而不敢誰何或以識暗才劣而不能廉察至於觀望權勢則方且奉承之不暇交通賄賂則爲之委曲以相容夫爲一路刺舉之官而失職如是則守令之無狀固不足恠守令旣無狀而欲七者之治皆舉亦已難矣臣愚伏望聖慈特降睿旨今後監司有關須擇七品以上清望官或曾經朝廷擢用或曾任郡守治狀顯著者爲之所貴位望兼重而可以付之權才能已試而足以舉其職守令皆知奉法不負 陛下宵旰圖

治之意取進止

乞審聽察劄子

臣伏觀詔書以星文示變上軫聖慮許士庶實封陳言又令諸路監司郡守條具便民寬恤事件聞奏仰見 陛下嚴恭寅畏克謹天戒亟欲消變復臻和平天下幸甚然臣竊謂求言雖易聽察爲難詔旨流行四海之內皆將竭忠盡誠爭獻所聞事有利害固無患壅塞而不上達也旣又分命有司看詳其說則是非混淆亦不必慮而臣區區所見尚恐疎遠之人銳於納忠設意過當有彊出新意而至衝改祖宗舊法

者有取便一時而行之既久不能無害者有貪蠲復之名而不以用度較之致州縣不免暗取於民者若此之類自非深思熟慮實難遽見臣愚欲望聖慈明詔有司凡看詳羣臣所上章奏必須審御究極事情不得一切苟簡更乞萬幾之暇躬垂省覽唯不悖戾祖宗舊法可以經久而實惠及物乃聽施行庶幾事體稍重動合人心而和氣可召災異非所憂也取進止

辭免除參知政事劄子

臣今月二十五日伏蒙 聖恩除臣參知政事特降

中使宣押赴都堂治事者臣聞命震驚罔知所措伏念臣資本庸陋齒迫衰殘頃已辭榮絕無進望 陛下俯憐舊物召真銓曹雖竭疲駑謾淹歲月方懼曠瘵之責敢希超躡之除况此邇臣與聞大政允謂機衡之要地必資英博之奇材非臣空疎所宜叨據伏望聖慈推仁從欲爲官擇人收還誤恩以允公議臣無任懇祈激切俟命之至取進止

辭免再賜對衣金帶鞍馬劄子

臣蒙恩除參知政事今月六日正謝又蒙聖慈賜臣對衣金帶魚袋鞍馬竊緣臣被命之初已經宣賜今

茲豈敢再冒龍光伏望陛下察臣庸虛之資方辱
高位念臣盈滿之戒難當異恩特降旨揮追還所賜
臣無任惶懼俟命之至取進止

無由應命... 臣無任惶懼俟命之至取進止
臣無任惶懼俟命之至取進止
臣無任惶懼俟命之至取進止
臣無任惶懼俟命之至取進止
臣無任惶懼俟命之至取進止
臣無任惶懼俟命之至取進止
臣無任惶懼俟命之至取進止
臣無任惶懼俟命之至取進止
臣無任惶懼俟命之至取進止
臣無任惶懼俟命之至取進止

華陽集卷第十五

畢

華陽集卷第十六

金壇後學于孔蕪校

劄子 奏狀

乞罷政第一劄子

臣輒瀝危誠上干天聽伏念臣賦材不敏學古無聞
遭值休明擢從遠外方上聖一新於邦治以非才參
贊於廟謨荷生成之恩為至深蒙寵遇之禮為甚厚
顧雖捐軀於萬死且難圖報於毫分詎敢懷安上孤
隆眷然臣分窮命薄福過災生氣積脾寒新秋頓作
目昏脚弱舊疾轉加豈惟竊位以妨賢亦恐養病而

廢職儻不知止必自遜辜伏望 皇帝陛下矜念么
微保全終始特垂恩造許臣解罷見任職事除一在
外宮觀差遣庶便醫藥稍安餘年臣無任祈天懇聖
激切俟命之至

乞罷政第二劄子

臣昨日獲對天顏面陳情懇乞解見任職事仰蒙
聖慈矜憐衰病存問再三臣退歸私第伏省恩言舉
室感戴至於涕泣今日又蒙特降中使宣押臣造朝
及赴都堂治事眷遇優渥臣何以克當伏念臣寒陋
書生本無片善叨榮逾分殃咎自貽秋深以來衆疾
交作自量疲苴難以久當重任伏望 皇帝陛下曲
垂憫恤檢會臣昨日所進劄子早降處分除臣一在
外宮觀差遣臣無任激切祈天俟命之至取進止

乞罷政第三劄子

臣近緣疾病陳乞解罷見任職事除臣一在外宮觀
差遣兩蒙聖慈特降中使宣押未賜俞允臣感激惶
懼不知所措臣聞朝廷之上一日二日萬幾責在二
三執政之臣必能殫志極慮夙夜匪懈然後不負寄
委之重臣素乏時才頃已辭祿遭遇 陛下非常之
知驟加錄用使預執政之列戴荷聖恩至深至厚非

不欲黽勉自竭趨就消埃少圖報稱實以衰殘多病
心力俱疲苟或不知自量豈唯臣一身負顛躓之憂
而朝廷萬幾亦未免有曠職之患伏望 皇帝陛下
曲推全度早賜矜從庶使餘生無愧公議臣無任祈
天懇聖激切俟命之至取進止

乞罷政第四劄子

臣比嘗三具劄子乞解職任今月九日伏准詔書不
允臣仰見聖慈憐念未忍弃捐顧臣何人膺此禮遇
區區危衷但極慚感伏念臣本無材術叨貳政機思
報國恩唯知自竭然三百六旬之久勞能蔑著於消

埃而七十五歲之身疾病已凋於齒髮是用投誠君
父冀遂退休敢期惠渥之臨尚闕俞音之錫臣以零
丁弱質衰謝餘年自知一去於軒墀難復再瞻於天
日豈不貪戀明聖顧懷顯榮第憂穠曠以招尤不容
勉彊而尸祿伏望 皇帝陛下乾坤亭育日月照臨
早降旨揮曲從所請儻獲因此苟延旦暮盡出陛下
生成之造臣無任祈天懇聖激切俟命之至取進止

辭免資政殿學士知婺州劄子

臣近者屢貢封章懇辭政事退量瀆犯方俟譴劾今
月十一日伏准尚書省劄子奉聖旨除臣資政殿學

士知婺州臣聞命震驚罔知所措臣竊謂士之從仕固欲善其始終君之待臣每務全於體貌至若便私而有請乃令因請以叨恩則上多虛授之嫌而下有難安之勢臣自膺重任亦既彌年初無橫草之功積有負薪之疾慮曠廢而速戾上玷清朝及彈擊之未加仰陳危懼使奉祠而得請尚憂公議之不容矧茲秘殿隆名金華古郡是所謂勲舊均勞之禮其可付衰殘養疾之人雖聖慈或出於愛忘而私義終難於冒處伏望 皇帝陛下矜臣愚拙唯合退閑特降旨揮收還成命止乞令臣守本官除一在外宮觀差遣庶安薄分用穆師言無任祈天懇聖激切俟命之至取進止

投進恩賜御書墨本劄子

臣昨准告除資政殿學士知婺州陛辭之日伏蒙聖慈特降中使齎御書一封賜臣通犀帶一條臣以異恩出於望外捧受之次兢惶不知所措仰見 陛下俯憐衰病驟去闕庭特示殊私俾安孤迹臣雖萬死豈足以上報委曲生全之造感戴至深言窮涕泣臣叨蒙光寵欲以傳示不朽輒將所賜御書摹勒上石謹以墨本裝成卷軸昧死投進庶幾少効臣子感恩

車陽集 卷之十一
四
歸美之萬一千冒天威臣無任墮越待罪之至取進
止

乞修心治國劄子

臣庸陋不才頃蒙 太上皇帝自小官拔擢至參大
政曾無毫髮功效上報厚恩迫以衰病謝事去國昨
者陛下受命握符光臨大寶臣屏伏田野逃聞堯舜
盛德之事無緣蹈舞玉階自同百獸今遇大駕時巡
過臣鄉郡臣可謂千載一時之幸輒有區區愚衷敢
因賜對冒昧奏聞臣伏見神宗皇帝卽位之初司馬
光任御史中丞論天下事未及其他而先之以人君

修心治國之要其言曰修心之要有三一曰仁二曰
明三曰武修政治興教化育萬物養百姓此人君之
仁也知道道義識安危別賢愚辨是非此人君之明也
惟道所在斷之不疑姦不能惑佞不能移此人君之
武也治國之要亦有三一曰官人二曰信賞三曰必
罰人主誠能收采天下之英俊隨其所長而用之有
功者勸之以重賞有罪者威之以嚴刑譬如乘輕車
駕駿馬總其六轡奮其鞭策何往而不可至哉臣誦
光遺文每至此未嘗不斂衽太息以謂古先哲王之
所以治天下與夫謀臣議士之所以盡忠於其君考

諸五經百氏歷代載籍之傳來其至精至要誠無出於此六者方今內憂弊政外患疆敵錢穀甲兵獄訟盜賊之事雜然上關聖慮實宵衣旰食之時臣願陛下俯念光言日加三省事有合於此六者必力行之害於此六者必亟去之一嘖一笑之間取則於是而無或暫忘若是則心之所主既簡而定萬幾雖繁應之不勞矣臣退閒既久時事不敢與聞獨獻平生服膺之言庶少補聰明之萬一惟陛下勿謂迂闊而弃之天下幸甚取進止

辭免起居舍人狀

紹興三年正月先兼中書門下省檢正諸房公事二月除

起居舍人

右臣今日

日准尚書省劄子奉

聖旨除臣起居

舍人日下供職者竊以史臣之職君舉必書宜付偉才以昭盛德而臣學不通古智昧趨時誤辱眷知召從踈遠使備員於宰屬顧何補於公家方懼尸榮更叨茂渥况當宁圖功之日衆賢聚於本朝而直筆記事之官一時謂之清選自視薄陋豈應冒居仰覲睿慈俯矜愚悃收還成命免致煩言所有恩命臣未敢祇受謹錄奏聞伏候勅旨

辭免中書舍人狀

紹興三年五月自起居舍人遷中書舍人

右臣今月十五日准尚書省劄子奉聖旨除臣中書舍人日下供職者竊以中書爲政事之源內史掌詞命之職惟時妙選宜屬偉才伏念臣行能不過於常人名實未孚於衆聽豈謂襄遲之迹誤蒙聖哲之知頃自外臺召寘宰屬未及暖席進列史官綴法從之清班望睟容於丹陛恩光厚矣自量已過於所期功効蔑如詎敢更叨於非據况乃代言之地尤以稱職爲難比偶闕貞猥嘗承乏書詔填委旣無潤色之能巧匠傍觀徒有汗顏之愧惟已試之如此亦自知之甚明儻遂卽真而不辭將恐煩言之隨至仰祈睿鑒俯察忱誠特反渙恩庶安愚分所有恩命臣未敢祇受謹錄奏聞伏候勅旨

除中書舍人舉魏良臣自代狀

蒙恩授前件職准令節文侍從官授訖三日內舉官一員自代者

右臣伏覩左從政郎充詳定一司勅令所刪定官魏良臣奮自學校聞于搢紳持已端方勵古人之節屬文典麗有作者之風舉以代臣實允公議謹錄奏聞伏候勅旨

乞宮觀第一狀

在中書舍人因母病連章乞祠養親章四上乃得旨送母還鄉

紹興三年八月十二日到
家復上章乞終養不允

右臣頃從踈賤躡處從班未有毫分少伸報効今以
事出迫切不避譴責輒輸悃誠仰瀆宸聽伏念臣父
母年老昨者迎侍偕來庶奉甘旨而臣父以不伏水
土先還里中獨留母氏于此涉夏至今卧病相仍緣
臣兄弟終鮮別無兼侍每趨朝入局藥餌俱廢今則
病勢寢劇未有痊損之期兼臣父在鄉孑然一身久
闕供養人子之心實不遑處欲望聖慈矜憐特令臣
以本官任在外宮觀一次庶當孝治之朝不廢篤親
之義臣無任祈天懇聖激切之至謹錄奏聞伏候勅

旨

乞宮觀第二狀

右臣近爲母氏久病輒具奏陳乞以本官任在外宮
觀一次伏蒙聖恩未賜俞允臣危誠迫切不能自己
再干天聽罪不容誅伏念臣母年垂八十昨緣迎侍
至此忽得脾疾醫療踰月至今未差臣叨塵侍從供
職未久初不敢便有陳請緣數日來疾勢增加而臣
職事之外餘力無幾旣兄弟終鮮又無得力子姪可
以供承藥餌責在臣身實虧孝養而臣父前歸鄉里
不願遠來甘旨之奉亦復久闕此臣所以日夜憂惶

華陽集 卷之十六
莫知所處仰恃 陛下天地養育之恩一物失所尚
軫 聖慮故輒再申前懇冀獲矜憐儻蒙從欲之仁
卽臣異日糜骨捐軀圖報未晚欲望睿慈特賜檢會
臣前奏令臣以本官任在外宮觀一次臣無任祈天
懇聖激切俟命之至謹錄奏聞伏候勅旨

乞宮觀第三狀

右臣近以母病再瀝誠懇上千天聽乞以本官任在
外宮觀豐蒙聖恩未賜俞允顧臣愚分豈當更有敘
陳實以情迫于中不能自己臣聞臣子之事君親恩
義相須未有闕於事親而能事其君者臣愚不肖仰

荷 陛下拔擢豈不知竭犬馬之力圖報萬分實緣
母病日久父先還鄉所以供子職者唯臣一身恩愛
所牽不皇寧處今來母氏所苦醫療百端未見減損
衰晚之年氣血浸耗竊欲迎侍蚤歸鄉閭若蒙天慈
俯遂前請則臣一門賴 陛下優容生養之恩過於
天地異時碎首捐軀誓圖報塞臣以供承藥餌見今
在告深恐因循妨廢職事伏望聖慈察臣懇迫之情
特賜檢會前奏令臣以本官任在外宮觀一次干冒
天威臣無任戰懼俯伏待命之至謹錄奏聞伏候勅
旨

乞宮觀第四狀

右臣昨為母氏不安奏乞在外宮觀差遣以便醫藥
 准尚書省劄子奉聖旨不允續蒙給臣寬假仍許將
 母還鄉臣一介賤微上荷聖慈察其懇切曲加矜念
 仰惟天地父母涵容拊育之恩非臣殞首捐軀所能
 報稱臣本貫鎮江府金壇縣已於八月十二日迎侍
 到家自初得告今已逾月望闕懷戀夙夜靡寧便當
 還朝亟就班次緣臣母病寢久未獲痊平氣血虛羸
 近尤增劇臣別無兄弟侍疾嘗藥唯臣一身遽捨而
 去於義難處若更在假淹留又恐益廢職事私情雖
 迫公議肯容臣幸以謫薄之資躡升華近之列惟思
 荅効豈敢懷安特由恩愛所牽奔趨莫遂俯仰自念
 憂灼彌深是用輒冒天威具陳前懇伏望 陛下俯
 垂睿聽特賜檢會臣七月二十五日以後累奏令臣
 以本官任在外宮觀一次庶幾菽水致養免於遺親
 犬馬報恩期以異日臣無任祈天懇聖激切惶懼之
 至謹錄奏聞伏候勅音

華陽集卷第十六

畢

華陽集卷第十七

金壇後學于文熙校

奏狀

駁陳鑄吳說差遣指揮狀

右臣今月十四日准中書門下省送到錄黃一道右
朝奉大夫吳說差權發遣江南西路轉運判官右承
議郎陳鑄差提舉兩浙西路茶鹽公事臣伏見吳說
陳鑄輕佻不端皆無素行內吳說昨任兩浙市舶緣
苗傅叛逆附會兇黨忽除金部郎官仍領市舶職事
後因臺臣論列罪狀顯明與劉蒙范仲熊等同被黜

責未幾復除福建運判物論大喧偶緣丁憂遂免彈擊兼其爲人貪冒無耻嘗以習書大字所在求請牌額爲人題寫以徼厚利有識鄙之鑄昨任江東鹽香過惡暴著言者亦嘗論其貪污夤緣冒進等事而罷其差遣臣不復縷陳契勘監司刺舉一路委寄非輕如二人者皆罪戾之餘久犯清議方當循名責實之公朝豈容更叨重寄臣若不言必致公論沸騰復煩朝廷改命欲望聖慈當成命未行之時特賜寢罷所有上件錄黃臣未敢書行繳連在前謹錄奏聞伏候勅旨

駁陳伯彊恩澤指揮狀

右臣今月二十五日准中書門下省送到錄黃一件爲陳獻用父伯彊致仕恩澤特補將仕郎臣檢會紹興薦舉令節文諸中大夫以下見責降乞致仕不得乞蔭補恩澤臣看詳陳獻父伯彊昨任正言得罪送吏部與合人差遣未經牽復間守本官致仕正是責降中致仕之人於條不合陳乞蔭補據陳獻狀詞自稱伯彊因言高侂妄造聖語得罪其事有無虛實歲月深遠難以攷究正使當時所言罪狀有實則責降之後亦須先經朝廷洗雪始可追復給還致仕恩澤

况伯彊之死已近三十年前此未嘗敘雪陳乞今迺遽有此命不知何所據憑其人引用沈疇近例又不知疇之所乞於見行格法有無違礙夫法者所與天下公共者也今來陳伯彊身雖已死罪籍未除若遽推恩與子卽今日以前死於責籍者更引伯彊近例將何以止之臣愚欲望聖慈特降睿旨將所與陳獻一資恩澤遵依紹興條令特賜寢罷以絕僥倖之路所有錄黃臣未敢書行繳連在前謹錄奏聞伏候勅旨

繳薛昂復官恩澤詞頭狀

正月二十六日准中書省吏房送到詞頭一道責授左中奉大夫薛昂上遺表事奉聖旨薛昂特追復特進其遺表恩澤依條施行令臣命詞行下者右臣契勘自來臣寮死於責籍察其平時無甚顯惡則追復官職間亦有之蓋是朝廷一時特恩不可以爲常也臣竊見薛昂以腐儒之學黨附蔡京致位近弼當政和宣和間朝廷大事一無建明專務諂諛同惡相濟稔成今日艱危之禍天下疾之甚於仇讎罪惡顯著臣不復具陳陛下寬恩不賜竄殛俾得終於牖下已爲厚幸今若因其所上遺表追復舊官卽是

誤國之臣歿有榮耀非特忠邪不辨無以昭示天下
兼恐應責降中身亡之人有如昂者復引此爲例無
辭以却臣愚欲望聖慈將薛昂追復特進恩命特賜
寢罷所有上件詞頭臣未敢譏述謹錄奏聞伏候勅
旨

駁張公裕解宇指揮狀

今日二十九日中書門下省工房送到勅黃一道
爲奉聖旨指揮梁汝嘉將舊祗候庫屋十間添修
充張公裕解宇其雜買務別行踏逐令臣書行者
右臣竊見自來官司解宇皆以所管職事爲名其下

便爲治所未有無職事而得居解宇者今來張公裕
係同管客省四方館閣門公事兼總領海船契勘客
省閣門等職事見在禁中從舊不曾別置解宇兼客
省閣門官非止公裕一名公裕應得他人皆可得也
若以總領海船爲名則其職事係在明州於行朝別
無所治豈有置解宇於此而逢領職事於彼者况舊
祗候庫已改作戶部雜買務今若添修充張公裕解
宇其雜買務別行踏逐不唯公裕居之無名而改更
添修土木工役煩費實多兼恐僥倖之門一啓他日
滋蔓無以杜絕臣愚欲望聖慈特下有司參照如張

公裕目今職事不當得解宇卽乞將上件聖旨指揮
速行寢罷所有勅黃臣未敢書行謹錄奏聞伏候勅
旨

駁錢稔與郡指揮狀

今月初七日晚准中書門下省送到勅黃一道奉
聖旨錢稔與郡令臣書行者
右臣竊觀比年以來所以害民者莫甚乎貪殘之吏
廼者陛下數頒明詔訓敕中外又臨遣五御史巡行
郡國以察治狀其有贓汙不法與夫刑獄冤濫皆得
以上聞仰見聖心慨然欲革其弊甚盛德也臣方竊

喜以謂貪殘之吏自是當知所畏矣今日忽見錢稔
得旨與郡衆口謹譁殊不曉所以然者契勘錢稔素
無廉聲而有酷惡之資頃爲臣寮論列其奉使浙西
則罪贓狼籍皆得所取受迹狀甚明其任大理少卿
則持刑不平專事觀望嘗以三等風指授其同列臣
雖不識稔以言章攷之而叅以士論益行汙寄治倚
權勢爲暴者也貪殘二字稔實盡之若使之爲郡其
能以廉節自持爲陛下牧養小民乎其能體欽恤之
意而不擾於獄市乎向自廷尉以彈章罷職未幾除
知台州又復言罷衆謂稔當廢放終身今日豈可更

臨郡寄臣愚欲望聖慈察前後章疏所言罪狀將今來與郡指揮特賜寢罷所有錄黃臣未敢書行謹錄奏聞伏候勅旨

乞宮觀第一狀

右臣輒傾危悃上千睿聽情有所迫罪不容誅伏念臣猥以凡庸繆塵禁近竊祿逾分天降疾災舊苦風痰常多昏眩迺自此月十一日以來驟爾復作頭目旋暈顛仆弗支心悸氣滿移時方定迨今旬日發動至再臣職在詞掖實掌贊書方當無病之時猶負素餐之愧矧茲遽嬰疾疢豈不深懼曠瘵兼臣父母垂

年久還鄉里旁無兼侍供養有關人子之分實不自安伏望陛下察臣病衰難於任事憐臣親老許以便私特垂天地覆育之恩令臣以本官任在外宮觀差遣一次庶獲少休餘息不廢孝養他日圖報誓當糜捐臣無任祈天懇聖激切俟命之至謹錄奏聞伏候勅旨

乞宮觀第二狀

右臣近以風眩不安嘗傾危悃乞以本官任在外宮觀差遣伏蒙聖慈未賜俞允忱情迫切欲已不能伏念臣謬忝禁嚴粗知分義既謂居官而任責豈敢無

故而求間誠以叨昧踰涯災疾橫作驚悸旋暈衆所
共知行立稍勞即使發動每當趨就朝列常虞顛仆
失容至若入直省中亦恐眩昏曠職今在告醫治已
是數日未獲痊平顧茲詞掖機要之司非是臣愚養
痾之地此臣所以憂惶踈踏莫知攸處所有臣父母
闕養固已嘗具奏陳更不敢喋喋干冒天聽今者止
爲臣身自嬰疾難於任事理須控告遂至黷煩伏望
聖慈俯垂矜憫特賜睿旨檢會臣前奏令臣以本官
任在外宮觀差遣一次輕犯天威臣無任惶懼待罪
之至謹錄奏聞伏候勅旨

駁汪若海差遣指揮狀

右臣今月十三日准中書門下省送到勅黃一道爲
右宣義郎趙不凡差通判泉州右宣義郎鄧襄通判
沅州右承奉郎汪若海通判無爲軍令臣書行臣伏
見數內汪若海浮躁輕脫素無士檢昨任三省樞密
院幹辦官與同僚何大圭日事蒲酒肆爲荒嫚爭淫
娼婦至相歐擊嘗爲臺臣論列除名勒停編置嶺外
偃蹇不赴欲圖苟免後蒙寬恩釋放稍還官秩而故
態弗悛逋蕩無復羞畏搢紳之所不齒方今州郡之
治責在守倅無爲雖號小壘屢經殘破正賴撫綏得

人乃以半刺之權付此狂士竊恐陵上虐下有害郡政不能仰副陛下寬恤元元之意兼若海見係監當資序罪廢之後升爲通判士論疑之臣愚欲望聖慈將汪若海通判無爲軍指揮特賜寢罷所勅黃臣未敢書行謹錄奏聞伏候勅旨

駁折彥質衝改指揮狀

今月初七日准中書門下省送到勅黃爲知潭州折彥質奏乞詳酌紹興三年十月二十五日指揮爲土豪及細民乘時作過等事今謹開具下項一檢會紹興三年十月二十五日指揮節文自

紹興二年正月一日以前諸路州縣曾經金人占據及羣寇殘破去處土豪專輒斬殺并鄉村細民乘時作過限今降指揮到日將已受詞訴限十日結絕不得支蔓日後更有詞訴並不得受理

一今來折彥質申請乞更詳酌紹興三年十月二十五日指揮將委曾殺人放火如被苦之家自陳若鄰保及徒中告首而事狀彰聞證佐明白者內爲首之人許依法勘斷自餘支黨特免窮治卽事不干已并教唆詞訟或官吏不爲審

實輒行追追捕繫者並坐以法四月七日奉聖
旨今後如有論訴或告首罪惡顯著事迹明白
官司見得詣實方許勾追證佐將爲首人依法
勘斷自餘支黨特免窮治不得稍涉支蔓餘依
所乞

右臣看詳紹興三年十月二十五日指揮蓋緣兵火
之際小人乘時作過至今經隔五六年而詞訴不絕
獄訟滋多所以特降聖旨截自紹興二年正月一日
以前所犯已在官者限日結絕未在官者指揮到後
並不許受理今折彥質所奏乞詳酌上件指揮將委

曾殺人放火如被苦之家自陳若隣保及徒中告首
將爲首之人許依法勘斷卽是前來指揮全不可遵
用再詳四月七日聖旨今後如有論訴或告首罪惡
顯著事迹明白官司見得詣實方許勾追證佐將爲
首人依法勘斷臣竊謂朝廷立法益本人情自建炎
兵火以來無知之人所在作過何所不有州縣根治
誅鋤首惡略盡其有不經官司論訴者必是事迹不
甚顯著兼其情理亦必不至切害如此等罪雖未陳
論理宜矜恕聽其自新今所犯在數年之前事旣滅
息乃始降指揮許令告首卽與當時立法之意正相

背戾指揮纔下將見平日挾怨規利之徒自此轉相告訐無有已時事既在官若不勾追證佐何由見得詣實雖云不得稍涉支蔓方首從未分之時追逮所及支蔓必多若以謂被苦之家及隣保等必欲訴寃則兵火纔息自合陳告何至今日乃始生事自降不許受理指揮至今將及半年若又衝改不行豈唯滋長姦弊亦恐無以示信四方以臣所見紹興三年十月二十五日指揮委是允當却合依舊遵守所有今來錄黃臣未敢書行伏望聖慈更賜詳酌謹錄奏聞伏候勅旨

又貼黃稱

契勘紹興三年十月二十五日指揮係臣面對奏請施行事今折彥質所乞乃是衝改已降指揮與臣當時奏請之意不同故臣不得不論乞賜睿察

華陽集卷第十七 戰平曰狹然規利之徒自此轉相

爭鬪在官若不勾追登位何由見得

...

...

...

...

...

...

...

...

...

...

...

...

...

...

...

...

...

...

...

...



卷一